

SAN JUAN KARTA E'STEWE'SX

Dxus we'weni isasa's jiisa' peeygāawa'ja's ji'phu'tx

¹Naa karta's fxi'jsa' na'wē thē'j jīna kxsusu'tx txāath fxi'ja', pe'sx Dxus txhithxnisa vxite' i'kwe luuçxtxi. Adxa' txāawe'sxtxi' isa peeygāayuju'th. Aça' adxçxáa txā'wē yu'çmeeth. Dxus we'weni isasa's jiyusa yu' jxukaysatx txā'wē peeygāja'. ²Dxus we'weni isasa' kwe'sx yakh nesku yu', sa' bagaçxtewa kwe'sx ūuste nes yuuna. Txā'wē Dxus we'weni isasa's ūuste ji'phçxath i'kwe'sxtxi peeygāja'. ³Kwe'sx Tata vxite' txajx nçxi'k Jesukristo txāa e'zsa wala peeygāhçxa i'kwe'sxtxi pu'çxhitxna ewçxáa fxi'zekahn.

⁴Txā'wē luuçx maafí yu' Dxus kwe'sx Tata jxkaahni's kxtey nwēese'jna fxi'zena ūste uyçxa' wala weçxa'th. ⁵Sa' açxha', pe'sx, mpa'yajkxwe, puutx ya'peeygāhna fxi'zewa'ja's neewe'weçthu. Na'wē fxi'jni' u'se jxkaahnisame'. Nyafxíi jiyutha'w txāafíçxá'. ⁶Dxus jxkaahnitxi' kxtey nwēese'jna fxi'zete', puutx ya'peeygāhna fxi'zewa'j kasejena. I'kwe'sxa' nyafxíi iiwēese'jyā'ji'kwe Dxus jxkaahnitxi' txā' puutx ya'peeygāhna fxi'zewa'ja'.

Īsxiina u'jusa

⁷Naa kiwete īsxiisa wala kuh kasehçxa u'juta'. Txāawe'sxa' Dxus Nçxi'k Jesukristo' kwe'sx na'wēy nasaa yuuççak vxxyaa jī'çmeeta'. Txā'wē we'wesa' īsxiisa yuuna, sa' Kristo's açesaçxa txā'wē yuuna. ⁸Txāa pa'ga i'kwe'sxa' mpa'yajkxwe, Dxus yakh fxi'zepa'ga cielute dukhwa'ja's ivxiitumée, wejxwa makwetewa jxuka jxpa'gawa'ja'sçxáa myajkxwe.

⁹Kristo ma'wē kaapiya'the' maawa txā'wēy kaapiya'jsame' Dxus yakh fxi'zesameeçxa txā'wē yuuna. Nawa Kristo kaapiya'jniçxá's nwēese'jna fxi'zesa', Dxus yakh fxi'zesaçxa txā'wē yuuna, sa' Dxus Nçxi'k yakhwa txā'wēy fxi'zesa yuuna. ¹⁰Txā'wē maawa i'kwe'sx yat-su pa'lçxawa Kristo kaapiya'jni'sçxáa pta'sxsame's weçxana jxpa'ganuwe. ¹¹Txā'wē weçx ul'jwe'ga jīna txāawe'sxtxi jxpa'gasa' ewmée yūuya' pu'çxsa yuuna.

Pablo yuu puutx uyya' u'jya' yaakxni

¹²I'kwe'sxtxi wala we'wewa'j ji'pthu, nawa eçte txã'wẽ we'wena fxi'jya'wameeth. Adx yuu peekx yujxa'wath i'kwe'sx yakh teeçxa na'wẽçxah puutx uyya', sa' puutx uyçxa' jxukaysa weçxweçxa yaaki'nja'w.

¹³I'kwe yakhthê'jwa Dxus txhitxhnisa' aça' txajx luuçxa' yuwe weçxaa kaja'tx. Txã'wẽçxáa fxi'jaçthu.